



Taulogologo

O LE ALOFA FA'ATINĀ

ME 2019

Atonu e to'atele i tatou o lo'o soifua mai pea o tatou tinā. Ae manatu fo'i e to'atele nisi o i tatou ua vala'auina e le Atua o tatou tinā. Mo tatou ua maliliu o tatou tinā, e i ai taimi tatou te mafaufau ai iā i latou e le gata o le misia o i latou ae ona e i ai lava le lagona tatou te mana'omia lava o tatou tinā. E i ai taimi o le mana'omia ua na o tatou tinā e mafai ona fa'amalieina.

Atonu o le mafua'aga sili lenei, ina ua malii Iesu i luga o le koluse sa ia tofia lona tinā o Maria e avea fo'i ma o tatou tinā: ona o fa'afitauli e masani ona feagai ma i tatou i lenei olaga o ituaiga o fa'afitauli ia e mana'omia tele ai fautuaga alofa a o tatou tinā.

Ole Mafanafana ole alofa Fa'atinā

Ou te manatua se tala e uiga i se tama'ta'i talavou sa a'e i luga o se 'auala e sopo'ia luga o se isi 'auala pisi tele ma le loto e oso ifo i lalo i luga o le 'aualatele ma fa'auma ai lona ola. O se tagata na iloina atu o ia – o ni tinā e to'alua lana fanau ma lona tinā e to'aono lana fanau – na fa'atū le la ta'avale, vala'au le ofisa o leoleo ma taufetuli atu ma 'ai'oi atu i le tama'ita'i lea e "leai, 'aua le faia lea tulaga." Na tago atu le tinā lea i le va o u'amea ma taofi mai le ofu o le teine ma tu'u uma i ai lona malosi e taofi mai. O isi ta'avale na tau mai i ai na tutū ma taufetuli atu ma fesoasoani e taofiofi mai le tinā lenei e taumafai e taofi mai le teine. Sa fa'apea ai lava ona taunu'u mai isi ma fai lea faiga o le taofiofi o latou e pito i tua ma maua ai se laina umi lava. O se ali'i leoleo na muamua taunu'u mai, sa fa'amatala se va'aiga sa ia molimauiina: o se tama'ita'i o lo'o tautau mai luga o le 'auala i luga ma o lo'o taofiofi e le "anoanoa'i o tagata."

O le a le mafua'aga na taumafai ai lenei teine e faia lea mea? O le tinā na mua'i tau atu i ai na manatua le tala a le teine na fai mai pea mai pea iā te ia, "E lē alofa lo'u tinā iā a'u." Ae na fa'a'ole'ole atu lea tinā iā te ia i le va o ia u'amea ma fa'apea atu, "Leai, matou te alolofa iā te oe."

Ua na o se tinā ua maitauina ma iloina le fa'anoanoa ma le atuatuva'e o lenei teine. O se tinā fo'i na tamo'e atu e fesoasoani. O le tinā na fa'atopetope atu e lavea'ia lea teine. O le tinā na fa'amafanafana i le alofa. O le tinā fo'i na fa'aosofiaina le agalelei o isi tagata feoa'i i le ala e fesoasoani atu. E pei ona ta'ua e se tasi o latou ia, sa naunau lava tagata uma i lea taimi e le tu'u atu lenei teine e alu po'o le a lava le mafua'aga.

E manatua ai se fuaiupu o le pese tuai iā Maria *Ave Maris Stella* o lo'o 'ai'oi mai, "Fa'aali o 'oe o se tinā" (*Monstra te esse Matrem*). E i ai taimi a o tatou tautau fa'apea mo le ola, ua na o se tinā tatou te mapu atu i ai.

O le matagofie o Maria

Fai mai se tasi o tusi solo i sana tautalaga, "O le mea tatou te sa'ilia fa'ameaola o le matagofie, e lē o le losika." Aiseā? Ona o manatu e le mafaia ona tatou maua mai ai se lagona fou mo mafua'aga, se amataga fou, se mafua'aga e fa'amamulu atu ai auala ua na o le matagofie e mafaia.

O Me o le masina e avatua ai e le Ekalesia le fa'aeaea fa'apitoa iā Maria le Taupou Pa'ia. Fai mai fo'i se isi tusi tala, "O o'u manatu uma i le matagofie, i le mamalu ma le fa'atauva'a, o lo'o maua lea

i lo tatou Tinā Pa'ia." O le kalasia a Maria i o tatou olaga o le meaalofa lea a le Atua i le Matagofie ua tatou sa'ilia fa'ameaola ina ia tatou malamalama ai i le lalolagi o lo'o si'osi'omia ai i tatou.

Tatou te lē manana'o e fa'avauvau i o tatou olaga atoa ae ua tatou fa'alogoia le fa'avauvau pe a fa'amanatu mai e tagata iā i tatou le Atua. O lona uiga tatou te mana'omia i o tatou olaga se tagata, e fa'amanatu maia iā i tatou le Atua, e lē faia se mea tatou te fa'alogoia ai le fa'avauvau ona ua fa'amanuiaina o ia ile mana e *tu'u fa'atasia* ai i tatou ma le Atua, ma mafai ai ona tatou fo'ia o tatou fa'avauvau.

O se tasi o mea matagofie iā Sagato Paulo o le 'auala na ia a'oa'o ai e uiga i le Taupou Pa'ia o Maria ma lana matafaioi autū i le ola o le fa'atuatua. Na fa'amanino lelei e Paulo nisi o ana tusitusiga ia Maria e pei o le Tusi ia Kalatia (4: 4 – 5): "Ua o'o atu i le fa'a'atoaga o tausaga, ona auina mai lea e le Atua o lona Alo, ma fanau i le fafine, na fanau ua nofo i le tulafono; ina ia fa'atau mai e ia e na nofo i le tulafono, ia avea i tatou ma atali'i" (i le fa'aipoipoiga i Kana [Ioane 2: 4] ma mai le koluse [Ioane 19: 26], na fa'apea atu Iesu i lona tinā "Fafine"). O lo'o i ai se manatu agamālū ma le fa'atauana e uiga i le a'afiaga o le fa'aupuga e Paulo "fanau mai i le fafine." E foliga mai e pei e le mana'o e fa'agaloina auala na aumai ai e le Atua lona Alo iā i tatou. E le'i fa'afuase'ia ona tu mai Iesu; o ia o le fua o le manava o Maria, fanau i lona tino ma lona toto. Ma o le faiga mo i tatou o le a tatou maua e sau iā i tatou e ala mai i le faiga lava lea e tasi: e ala mai i le failele a Maria.

Talanoaga ma Maria

Sa i ai ni monike sa va'aia e Sagata Terese o Lisieux na maofa i latou pe a fa'ali atu e Terese o latou mafauauga – e pei e mafai e ia ona iloa mea o lo'o mafaufau i ai i latou. Ae na fa'amatala e Terese: "O la'u leolilo lenei. Ou te le fautuaina lava outou e aunoa ma le talosagaina o le Taupou Pa'ia. Ou te vala'au iā te ia ina ia fa'aosofiaina a'u e fai atu upu e lelei ai outou ma a'u ma e tele ona fa'ate'ia a'u i mea ou te a'oa'o atu ai outou. A ou tautala atu, e le fa'ate'ia a'u o lo'o tautala atu Iesu e ala atu iā a'u."

Ia fai ma o tatou masani le vala'au atu i le Taupou Pa'ia, talosagaina lana fa'aosofiaga mo mea sili le lelei ma le pa'ia. A tatou tagi atu i le tele o faigata ma le anoanoa'i o mataupu maoa'e o le avea ma avega mamafa i le mafaufau. O lē fa'atuatua e avatu o ia lava i nisi o taimi i se talanoaga alofa ma le agalelei ma le Tinā Taupou ma lana Tama. Ona e pei o le "alofa na tu'u fa'atasia i la'ua" ia fa'apea fo'i ona faia e le alofa a Maria i tatou.

Ia Fa'amanuia mai le Atua iā te outou Tinā Uma Lava.

AFIOGA KATINALE JOHN DEW



UŌ PELEINA

I aso o le Eseta pei ona mae'a atu nei sa tatou fa'alogologo ai i Evagelia o aso ta'itasi i tala e tele e uiga i so'o ma le fa'avavevave atu e ta'u atu i isi o lo'o soifua Iesu ma sa fa'aali mai ia i latou. Sa tumu i le fifia ma le loto tele, sa tumu tele i lea fiafia ua na o le pau lea o le mea ua talanoa mai ai o Iesu, i mea sa tautala mai ai ia i latou ma mea na ia faia. Ua latou iloina ua auina atu i latou e ia e ta'u atu i isi le tala lelei o le Evagelia.

I le masina talu ai na tusia ai e Pope Faranisisi se Tusi Fa'aaposetolo na ta'ua – CHRISTI VIVIT – O lo'o Soifua Keriso! O se tusi lenei na tusia i Tupulaga Talavou, ma i "Tagata Uma o le Atua." Na tusia mo i tatou ta'ito'atasi. I lene tusitusiga o lo'o tusia ai e Faranisisi e fa'apea:

O fea e auina atu i ai i tatou e Iesu? E leai ni tua'oi, leai ni muta'aga: ua auina atu i tatou i so'o se mea. Ole Evagelia e mo tagata uma, e le mo na o nisi. E le gata mo latou fo'i e latalata mai ia i tatou, latou e talia ma fa'aalufale. Mo tagata uma lava. 'Aua le fefe e

o atu ma avatu Keriso i nofoaga o le ola, i le fa'atausi'usi'u o le sosaiete, e o'o lava ia i latou ua tau mamao ma latou e leai ni popolega. E sa'ili e le Ali'i i latou uma nei; e mana'o i tagata uma e lagona le mafanafana o lona agalelei ma lona alofa". Ua vala'auina i tatou ina ia avea ma misionare e le fefe i so'o se mea tatou te i ai ma tagata ua tatou mafuta atu i ai: i o tatou tua'oi, i a'oa'oga po'o ta'aloga po'o olaga fa'alemausau, i fale faigaluega po'o nofoaga o galuega e faia i le alofa fo'i. So'o se mea ua tatou i ai, e maua lava le avanoa e fa'asoa ai le olioli o le Evagelia. E fa'apenā ona fealua'i lo tatou Ali'i ma feiloa'i atu i so'o se tagata. E alofa tele ia 'oe, tagata peleina e, ona o outou o mea faigaluega e mafai ai ona fa'asalalau lona malamalama ma le fa'amoemoe. O lo'o fa'amoemoe i lou loto tele, lou malosi ma lou naunauta'iga. (Christus Vivit 177)

Mo tatou o ni so'o a Iesu ua fa'amanatu mai ia i tatou, o tatou na auina atu. O le Sinoti a le Pule'aga Fa'aakiepiopiko i le 2017 o lona sini "**O, Ua Auina atu Outou.**" O le palakalafa i luga e mo tatou uma lava, e aoga ona metitasio ai ma fesili ia i tatou lava, pe aoga ona metitasio ai ma fesiligia i tatou lava pe fa'apefea ona tatou tali atu i le galuega tala'i a Iesu na tu'uina mai ia i tatou. Pe tatou te tali atu 'ea i le auina atu? Pe tatou te tali atu i le agalelei ma le loto tele? Pe, ua tatou manatu o o tatou palisi ma fa'apotopotoga ua lava lea. Fa'amolemole ia tomanatu i palakalafa i luga ma manatua o le mafua'aga e fa'atasi ai ma Iesu o le o atu lea mai ia Iesu i lona mana ma lana kalasia.

Ua fa'amanatu mai e le Tama Pa'ia o Iesu o lo'o fa'amoemoe i o tatou loto tetele, o tatou naunautai-ga...tatou o atu ma le loto tele o le Eseta, lototoa o le Eseta ma le Naunauta'iga o le Eseta.

Ma Fa'amanuiaga Uma Lava

+ Ioane

O LE MALAMALAMA I OU ALA

O le fa'amatalaga i le fa'aaliga a Iesu Toetū i le mafafaga o le Sami a Kalilaia o se tasi nei o tala matagofie ma le fa'atelosia i le Evagelia a Ioane. O fa'amatalaga uma ma 'auiliili e aoga tele mo tomanatuga.

Se'i o tatou va'ava'ai i nisi o mataupu. Ua tatou fa'alogologo mai nisi o Aposetolo e to'aono sa i le va'a i le sami. O taimi uma lava e talanoa mai ai se tasi o tusi Evagelia ia Peteru ma aposetolo i luga o se va'a, ua tataua ona tatou mafafau i le Ekalesia, ma le numera 'ese o le fitu – fa'aatagia malosi mai ai le atoaga po'o le fa'ataunu'uina – o lona uiga ia tatou fuafua i le fa'ai'uga o le Ekalesia, le fa'apotopotoga a Iesu a o savalia le fa'ai'uga o lana malaga e

O LE MALAMALAMA I OU ALA

ala i le taimi ma le paganoa, le fa'apopotoga a Iesu ua aga'i atu i le fa'ai'uga o lana faigamalaga i le paganoa ma le taimi. I le matafaga (i le va'ai atu muamua e le'i mailoaina o ia) o le Ali'i o Iesu. I lana fa'atonuga, sa latou lafo ai le upega ma maua mai ai le anoanoa'i o i'a. O galuega ia a le Ekalesia se'ia o'o i le gata'ana o tausaga: e fa'apopototo mai agaga ma aumai i latou ia Keriso i le i'uga o taimi fa'aola a le Ekalesia.

Ina ua latou sasa'a mai a latou upega i luma o Iesu, na latou maua mai ai i'a lapopo'a e 153. O numera e le o ni mea fa'afuase'ia i le Evagelia a Ioane, ma le tele o manatu i o latou uiga ua tu'uina mai. O le tala sili na aumai e Sagato Aukusitino. Fai mai le mau fa'asaenitisi o na taimi, e pei ona finauina e Aukusitino, e 153 ituaiga o i'a i le sami, ma o lea, o lenei numera maoa'e na fa'auigaina e fa'aioa ai le aoao o le galuega fa'aola a le Ekalesia.

Mo ituaiga o Buddha, o Buddha o se faia'oga sili ma se fa'aa'oa'o i amioga lelei. Sa ia maua se auala e magaalā valu ua ta'ita'ia ai o ia i le fa'aolataga fa'aleagaga, ma sa mana'o e fa'asoa lea atamai ma latou e mulimuli ia te ia. Mo tagata Muselami, o Mohammed o se perofeta maoa'e tele na manino lelei le fa'aliga na avatu i ai e Allah mo fa'asologa lelei o le ola. Mo Confucius o se a'oa'o i mataupu tau i le ola lelei. I le 'au atu i ana tulafono, ua talitonu e ola lelei ai tagata ma o gatasi ma sosaiete ma le vateatea.

Ona tatou o mai lea ia Iesu. O Iesu o se faia'oga, o se tagata e atamai, ma se fa'ata'ita'iga i mea lelei; ae o na mea uma e le mafai ona fa'amatala le atoaga o le uiga o Keriso i tagata Kerisiano. O ia i lona lava peresona, o se ola mana, ma o ia, e pei ona fa'amanino mai e Sagato Ioane, o le vine ua fa'apipi'i i ai ona so'o ma ala mai ai lo latou fa'atasi atu i le Atua. O le mafuaga lenā, i le fa'atumutumuga o lona olaga, ua le na ona ofo atu e Iesu ia i latou na mulimuli ia te ia fa'atonuga fa'aleagaga mulimuli, ae o lona Tino ma le Toto, sa tu'uina atu e feinu ma 'a'ai ai. Ma o le mafua'aga fo'i lenei ua fa'asino ai Paulo i le Ekalesia, e le o se sosaiete o tagata, ae o le Tino lava o Iesu.

E pei ona fai mai Iesu lava ia i le Mataupu ono a Ioane, *afai tou te lē 'a'ai ile tino o le Atali'i o le tagata, a lē inu fo'i i lona toto, ua lē i totonu ia te outou le ola*. E lē manatu e mafai ona sau se fa'aupuga fa'apea mai le gutu o Mohammed po'o Buddha po'o Confucius fo'i. I le malamalama i lea mea o le malamalama fo'i lea i le malosiga o le fa'a-Kerisiano.

O ME O LE MASINA O TINĀ:

O TAIMI TOTOGO O TATOU OLAGA

O se tasi o faife'au a le ituaiga o Iesu i le fa'ai'ui'u o le seneturi sefuluiva, na fesili i lana solo na tusia *O le Pese a Maria ia Me*:

O Me o le masina a Maria, ma o a'u
Ua fa'aosofia i lenā ma manatu pe aiseā:
O lona sulufaga e mulimuli i mafua'aga
O aso ua taunu'u i vaitausaga –

O tausaga uma ia Me tatou te liliu atu ai ia Maria ma fa'afou la tatou fa'aeaea ia te ia. Tatou te fa'apale ia te ia, aumai o teu fugala'au, tatou te tatalo le losalio ma se tu'uto fou. Ma pe aiseā ai o Me? E leai ma se tala ile Tusi Pa'ia o lo'o fa'asino mai se "sulufaga fa'aauau" o Me mo Maria. E leai fo'i i le kalena a le Ekalesia po'o se isi masina e fa'aaloalo ai ia Maria.

O le tali i le tu'utō ia Maria o lo'o maua lea i le olaga.
O lo'o aumai e tusi solo se mea molimau:

Fesili ia te ia, le tinā mamana:
O lana tali ua aumai ai le isi fesili:
O le a le Totogo?
O le Ola i mea uma –

O Me o le masina o Maria ona o le masina mo le totogo fou ma le aulelei. O le masina o le manogi ma le fou. O le masina o le ola ma le malamalama. E lē o se kalena fa'alelotu ua fa'asinoa i tatou ia Maria; o le fa'anaunauga o o tatou loto mo mea o lo'o fa'aali mai e Maria ma mea ua ia ofoina mai pea: "ola i mea uma lava."



'IA VI'IA OE'
(LAUDATO SI' - Pope Falanisisi
VII. O LE VA'AI A IESU

o le tala fa'asolopito ma fa'aleagaina ai le Talale-
 Na galue Iesu i ona lima, ma feso'ota'i atu fa'alea-
 mea na faia e le Atua, lea na ia tu'uina atu ai lona
 ga i ana galuega fa'atufuga. O se mea mata'ina i le
 o lona olaga na tu'utō atu i lenei galuega i se
 a faigofie lea e lē fa'ate'ia pe maofa ai se tasi: "E
 le tufuga ea lenei, le tama a Maria?" (Mk 6: 3) I
 i auala sa ia fa'apaiaina ai galuega a tagata ma
 eaina i se tāua fa'apitoa mo lo tatou atina'e. E pei
 a'oa'o mai e Sagato Ioane Paulo II, "e ala i le
 u i le fitā o le galulue fa'atasi ma Keriso na
 atauroina mo i tatou, le tagata i se auala e galulue
 asi ai ma le Alo o le Atua mo le togiolaina o taga-

99. O le malamalama'aga fa'a-Kerisiano i le
 agi, o le taunu'uga lea o foafoaga uma ua fusia
 fa'atasi ma le misitelio o Keriso, sa i ai mai le ama-
 taga: "Na faia e ia mea uma lava, na faia foi mo
 ia." (Kolose 1:16) I le fa'atomuaga o le Evagelia a
 Ioane (1:1-18) ua fa'aailoa ai le galuega fa'atino a Ker-
 iso o le Upu Manana (Logos). Peitai, e le'i mafaufau-
 na, na fa'asolo pea le folasaga ma fa'apea mai o le
 Upu lea "ua liutino." (Ioane 1:14) E tasi le Peresona o
 le Tolutasi Paia na ulufale atu i le foafoaina o le
 lalolagi, ma sasa'a atoa atu i ai, e o'o lava i le koluse.
 Mai lava i le amataga o le lalolagi, aemaise lava e ala i
 le liutino tagata, o lo'o galue le misitelio o Keriso i se
 auala lilo i le lalolagi fa'alenua i lona atoaga, e lē
 a'afia ai lona lava saolotoga.

100. I le Feagaiga Fou e lē gata ina ta'u maia
 ia i tatou le Iesu fa'alelalolagi, lona tino tagata moni
 ma lona so'otaga alofa ma le lalolagi. Ua fa'aalia ai
 foi lona toetū ma le mamalu, o lo'o i ai o la i le
 foafoaga uma e ala i lana Puleaga aoao: "Auā ua fina-
 galo le Atua ia mau i totonu ia te ia le tumu atoatoa,
 ina ia fa'aleleia e ia o mea uma lava mo ia, ina ia
 lelei i le toto o lona satauro." (Kolose 1: 19-20) Lea
 ua ta'ita'ia atu ai i tatou ina ia fa'asagatonu le tatou
 va'ai i le i'uga o le lalolagi, pe a tu'uina atu e le Alo
 mea uma i le Tamā, ina ia "pule aoao le Atua i le aoao
 o mea." (1 Korinito 15:28) O le mea lea, o meaola
 uma o lenei lalolagi e lē toe fa'aalia maia ia i tatou e
 ala i foliga masani fa'alenua auā o Lē ua toetū na te
 umia fa'amisitelio ia mea uma ma taitai atu agai i le
 atoaga e pei o latou i'uga. O fugala'au moni o le fanua
 ma manu felelei lea na mafaufau loloto ma fa'ameme-
 lo i ai mata fa'aletagata, ua fa'atumuliaina nei i le su-
 sulu i lona afio ai.

— e faia pea — Fa'alliina Falefou Sio

96. Na talia e Iesu le fa'atuatua fa'ale-tusipaia
 i le Atua o le Foafoa, ma fa'amamafaina i ai le mea
 moni: O le Atua o le Tamā. (Mt 11:25) A'o fetautal-
 atalaa'i ma ona so'o, na vala'auliaina ai i latou e Iesu
 ina ia latou iloa le so'otaga vavalalata o le Atua ma
 ana foafoaga uma. Fa'atasi ai ma le loto agamalu na ia
 fa'amanatu atu ai ia i latou e tāua uma i latou i le
 silafaga a le Atua: "E le fa'atauina ea manu iti e lima
 mo penina e lua? Ma e leai se tasi o i latou ua galo i
 luma o le Atua." (Lk 12: 6) "Va'ai i manu felelei o le
 vanimonimo: latou te le lūlū saito, pe selesele, pe
 latou te fa'aputu i le fale saito, ae fagaina i latou e lo
 outou Tamā oi le lagi." (Mt 6:26)

97. Na fa'apea ona vala'aulia e le Alii nisi ina
 ia gaua'i atu i le matagofie o lo'o i ai i le lalolagi auā
 o ia lava sa i ai pea i taimi uma fa'atasi ma le natura,
 ma tu'u atu i ai se gaua'i e tumu i le agaalofo ma le
 ofoofogia. A'o ui atu o ia i le fogāelelele uma, sa mas-
 ani ona malōlō ma mafaufau loloto i le matagofie na
 lūlūina e lona Tamā, ma vala'aulia ona so'o ina ia
 latou iloa se feau paia i nei mea: "Ia tepa a'e o outou
 mata, ma va'ava'ai i le fanua ua sinasina mai nei i le
 seleselegāsaito." (Ioane 4:35) "E tusa le malo o le
 Atua ma le fua o le sinapi, na ave e le tasi tagata, ma
 toto i lona fanua; e itiiti lava ia i fua o la'au uma, pe a
 uma ona tupu, e sili ia i la'au afu uma." (Mt 13: 31-
 32)

98. Na soifua fiafia atoatoa Iesu i le foafoaga,
 ae na maofa ai nisi: "Pe se a le uiga o lenei tagata,
 auā ua usiusitai ia te ia le matagi ma le vai?" (Mt
 8:27). I lona fa'aali mai e lē o se tagataese na vaetofia
 mai le lalolagi, e lē o se fili foi o mea matagofie o le
 olaga. Na ia fetalai mo ia lava: "Na sau foi le Atalii o
 le Tagata ua ai o ia ma inu, ona latou fa'apea ane
 lea, Fa'auta, o le tagata ai tele ma le inu uaina." (Mt
 11:19). Sa taumamao o ia mai filosofia e inosia e le
 tino, mai mataupu ma mea o le lalolagi. O ia ituaiga o
 amioga itulua e lē manuia, ae ui i lea, ua tu'u ai se
 fa'aailoga i nisi o le au faimafaufau Kerisiano i le gaso-

AMIOGA MA LE EUKALISITIA – KORINITO

O TUSI I LE EKALESLIA I KORINITO NA TUSIA ina ua mae'a ona fa'amautu Sagato Paulo i Efeso; le ulua'i taimi i le 57 AD, lona lua mulimuli ane i le tausaga i le tausaga lava lea. O ni tali atu i ni fesili tu'usa'o ma ni lu'itau, ma e masalo sa i ai nisi tusi pe tasi pe sili atu i le lua sa māsiāsi tele le 'au Korinito e fa'asao.

Sa i ai ni mataupu matuiā tele i mataupu tau i amioaga i Kerisiano anamua, ma o nisi ua maoa'e tele. Sa taumafai Paulo e togafitia lea fa'aletonu, ma fa'amani-no o le fa'aipoipoiga o se tofiga e lelei ma pa'ia, ae e lē mo tagata uma, ma o amioaga lē talafeagai o aganu'u i autafa o le a le fa'aogaina. Sa i ai se lapata'iga mo Kerisiano o le a tā'ape'ape i ni vaega, ma na iloaina le fetaua'i o latou sa fa'aevagelia e Paulo ma latou na mua'italiaina le fa'atuatua i le fa'aiutaia mai ulua'i aposetolo. O lo'o i ai fo'i le fa'afitauli ma le 'au fai filosofia a Eleni, e manana'o i le finauga i lo le mea moni, ma le fesili e uiga le tu'u avanoa a Kerisiano e fetu'utu'una'i ai ma faiga talosaga a tagata fa'apaupau. So'o se ituaiga o fa'apaupau o le a lē a'afia, ae ia 'aue ne'i tu'ufesili po'o ni 'a'ano o manu i le maketi na sau mai le malumalu. O le isi fa'afitauli mo tagata Eleni o le toetū o le tino: na fa'amausalī e Sagato Paulo o tatou uma e toetutū mai, ae suia o le a avea le tino toetū mai o le tino fa'aleagaga (1 Korinito 15).

E sili atu le taūa o a'oa'oga a Sagato Paulo e uiga ile mana ma le a'afiaga e le Agaga Pa'ia i o latou olaga, fa'atasi ai ma le faitauga ta'uta'ua e uiga i le alofa (1 Korinito 13), sa tautala manino ai e uiga ile Eukalisitia. O lo'o manino lelei mai ai o le faitaulaga, na fa'afeagai lelei ma faiga taulaga a fa'apaupau anamua,

o latou e fa'asoa i le tino o le manu ua avea ma tasi ma le atua: ae o tatou ua avea ma tasi ma Keriso ona ua tatou fa'asoa i lona Tino (1 Korinito 10: 14 – 22). O le mea lea ua avea ai i tatou ma Ekalesia, na fa'atusatusa e Sagato Paulo le Ekalesia i le tino o le tagata e i ai le matafaioi a vaega ta'itasi o le tino e fa'atino; o tatou ta'ito'atasi e tofu ma meaalofa fa'apitoa, ma se matafaioi fa'apitoa, mo le atia'e o le Tino o Keriso (1 Korinito 12).

O le tusi lonalua ua toe asia nisi o nei sini, ma toe fa'alelei atili le 'auga o le tofi a Sagato Paulo: o ia o se aposetolo e pei o isi, ae o le mea sili lona taūa o le fa'atuatua o lo'o a'oa'oina lelei lava. I le tūtū fa'atasi ai ma aposetolo i Ierusalem sa ia fa'amaopopoina se lafoga mo le 'au matitiva i le Nu'u Pa'ia – o ulua'i galuega fesoasoani i nu'u i fafo a le lalolagi. Na mafua ai le fa'atausua'i uiga'ese (2 Korinito 10 – 12) ina ua tele o mea ua ia faia mo le Ekalesia, le tele o lona puapugatia ona o le tala'iga, se'ia ona fa'aioaina ona vaivaiga – e masalomia o lona maitaita – ma le fa'atauanau i le Atua ina ia ave'ese atu lea uiga, ae o le tali a le Ali'i, "Auā o le vaivai e fa'a'atoaina ai lo'u mana" – o se tusitusiga fa'aloto tele mo latou uma o lo'o tauivi i faiga a le agasala (2 Korinito 12: 7 – 10).

Mai a Sakaria ia Akapusi: O le Agaga Paia ile Evagelia a Luka ma le Tusi o Galuega a le Au Aposetolo

Mai tusitusiga a Adrian Gruffy – fa'aliliuina e Lauano Ilaoa

Ole Agaga Paia e aupito i sili ona talanoaina ma ta'ua i totonu ole Evagelia a Luka, nai lo isi Evagelia uma ile Tusi Paia. O le tusitusiga muamua lenei ua su'esu'eina ai ia fa'aupuga o lo'o fa'atatau ile Agaga Paia i le Evagelia a Luka, fa'apea ma lona lua o ana tusi ile 'Galuega a le Au Aposetolo'. E fa'apefea i nei tusitusiga o le Feagaiga Fou, ona avea ma ta'iala o lo tatou iloa ole galuega a le Agaga Paia, ma lo tatou talitonuga iai ile aga'i i luma? E pei ona saunua le Tama Paia ia Pope Falanisisi, o le Ekalesia 'o se avanoa malu puipuia', e mafai ona gaiioi ai le Agaga Paia. O Patele Adrian Gruffy, o le

Faifeau Pule ole aulotu a Gidea Park, ma o ia o se sui auai ole Komisi Filifilia a le Tupusa mo Suesuega ole Tusi Paia.

O mataupu amata ole Evagelia a Luka, o loo fa'amani mai ai auala e galue ai le Agaga Paia e u'una'i ma fa'atino galuega ole fa'aolataga. O le Agaga Paia sa fa'aosofia le 'au fa'atuatua o e sa iloga o latou taimi e pei o fa'amaumauga i le Feagaiga Fou. O le faifeau o Sakaria sa fa'aioa iai i totonu ole malumalu o le atalii ole a fanau e lona to'alua mo ia o le a 'fa'atumulia ile Agaga Paia', ao lei fanau mai o ia. (Luka 1.15), ma o Sakaria foi ia, o le tulaga lava lea o loo fa'amatalaina ai o ia, ao ia sauni e folafola le salamo ua fa'aigoaina ole Penetikoso po ole *Benedictus* (Luka 1.67-79). A'o tuputupu a'e le tama o Ioane, o le a 'malosi lona loto' (Luka 1.80)

Sa fa'apea foi ona malosi ma maua'a le Agaga Paia i le tinā o Ioane. O Elisapeta ua 'fa'atumulia ile Agaga Paia' ina ua asiasi atu Maria iā te ia (Luka 1.41). Sa fa'aamua o ia iā Maria ma le pepe ole a fanau mai iā

MAI A SAKARIA IA AKAPUSI: O LE AGAGA PAIA ILE EVAGELIA A LUKA MA LE TUSI O GALUEGA A LE AU APOSETOLO - FA'ALILIUINA LAUANO A. ILAOA

te ia.(Luka1.42). Ona fa'aauau ai lea ole Evagelia i le isi salamo, lea ua tatou iloa e ta'ua ole *Magnificat*. O salamo nei e lua, ole *Benedictus* ma le *Magnificat*, e toatele e talitonu, na fa'atoa fa'aofi mulimuli e avea ma vaega ole evagelia.E talitonu foi le to'atele o nei salamo e foliga le fetau ma le tulaga o iai i totonu ole evagelia.

O se vaega tele o lenei tusitusiga (salamo), e lago-lagoina ai le manatu ole *Magnificat*, o le pese a Maria, ae peitai, e iai taimi o loo atagia ai i ona 'upu, o Elisapeta e patino iai. E ui ina vaivai lea finauga, ae iai lava le taofi fa'amata e ono moni le lagona ole *Magnificat* ole pese a Elisapeta, ma e le tatau ona fa'agaloina lea tulaga.O lea ua uma ona fa'amatalaina mai o Elisapeta o se tasi ua 'fa'atumulia ile Agaga Paia' (Luka 1.41), ma o lenei pese e pei ona fa'ailoa mai ai le alofa ole Atua, e mafai ona fa'apea o ia lava na fatuina, e pei foi o lana tane ia Sakaria, lea e ona le pese po'o le salamo ole *Benedictus*.

E iai nai vaega e tutusa ai le *Magnificat* ma le pese a Hana ile tusi o 1 Samuelu.2.1 ile taimi na fa'aalia lona fiafia ina ua iloa ole a fanau e ia sana tama.O lona uiga la, o Elisapeta foi ia, lea sa leai se manatu e maua sana tama (Luka 1.36), e talafeagai pe afai o ia e ona upu ia.Ae peitai, atonu pe ona o le tele ole fenumia'i poo ai tonu e ona upu oloo aofia ile pese, ua mafua ai ona tata'i manatu ole to'atele o le au fa'atuatua ole salamo lenei e matua talafeagai pe afai o upu ia a le tina ole Mesia, e ui ina o Elisapeta sa iai le manatu muamnuu.O Maria, e le pei o Sakaria ma Elisapeta ia sa faamatalaina e fa'apea ua 'fa'atumulia ile Agaga Paia'. Peitai, o Maria e manino le uiga'ese o lona tulaga, o ia o le auauna le leoa a le Alii, na faatoa tautala i se upu ile taimi na fa'ailoa ane ai e le Agelu le finagalo ole Alii mo ia (Luka 1.34&38).E lei toe iai se fa'amauga o se isi taimi na tautala ai Maria i le Evagelia atoa a Luka po'o le tusi o Galuega a le au Aposetolo, ona sa galue le Agaga Paia ia Maria, e le mo le fa'ailoaina mai ole perofetaga, ae mo le fuafuaga fa'apitoo o le liu tino tagata ole Alii. "E afio ifo le Agaga Paia i luga ia te oe, e fa'amalumu ifo foi ia te oe, le mana ole Silsili ese" (Luka 1.35)

O Sakaria ma Elisapeta, o ni molimau tautaua ia ile alofa silisili'ese ole Atua,ua fa'aopoopo atu iai se tasi o tagata iloga i lena vaitaimi e suafa ia Simeona,o se tasi ua matua lona soifua, ma sa ia fa'afeiloa'i ile Aiga Paia ile malumu, ma e fa'atolu ona feso'ota'i ma le Agaga Paia, e pei ona fa'amauina ile Luka 2.25-27: "ua i luga ia te ia le Agaga Paia": "ua uma ona fa'aalia ia te ia e le Agaga Paia": "Ole Agaga ua alu ai o ia ile malumu".O ia fa'amauga soso'o, ua saunia ai tatou mo lana salamo ole fa'afetai ma le lotu ua tumu ile fiafia (Nunc dimittis). O le faamatalaina e Luka o Ana o le 'perofeta fafine', ua lava lea e fa'amaonia ai o ia foi sa faatumulia ile Agaga Paia.

(Luka 2.36)

Ile taimi o lana galuega tala'i, sa masani ona tautala ai loane le Papatiso ile mana ole Agaga Paia ile Alii o Iesu ao ia taumafai e fa'amanino lana ia pitola'au. "O a'u nei le papatiso atu ia te outou ile vai" a o "le maliu mai, o ia lava na te papatiso ia te outou ile Agaga Paia ma le afi"(Luka 3.16). Fa'amata e le 'o se fa'ata'imuaga lenei ole afi uiga 'ese ole Aso Penetekoso ile Galuega 2.3? E tulaga 'ese foi le Evagelia a Luka le afio ifo ole Agaga Paia ia Iesu i se tulaga fai tino ile taimi o lna papatisoga.(Luka 3.22).

Ole Galuega a Iesu

E le o se mea e taumateina le tele o taimi ua ta'ua ai le Agaga, ina ua latalata le amatalia ole galuega a le Alii o Iesu ile lalolagi.O Iesu e "tumu ile Agaga Paia", na muamua ave e le Agaga ile vao tu'ufua (Luka 4.1) Ina ua uma ona fa'aosoosoina o ia ona 'toe foi atu lea o Iesu ile mana ole Agaga i Kalilaia'(Luka 4.14).O Mareko ma Mataio e amata a la tusitusiga o le galuega a Iesu, i le fa'ailoa mai ole malo ole Atua ma le vala'au ina ia salamō (Mareko1.5,Mataio.4.17), ae o Luka na ia fa'alauiloa le auai ole Agaga ma ia agai atu ai "ua a'oa'o o ia i o latou sunako ma ua viia ai o ia e tagata"(Luka 4.15). Sa fa'aagaga tusitusiga a Luka mo tagata faapaupau, ma sa fa'apea ona fa'aitiitia ai lona talanoaina ole malo ole Atua, ma lona uiga ona o ia talitonuga e faavae mai le Tusi Paia Eperu.Atonu foi pe sa ia le so'ona mamafa tele ile talanoaina ole Malo ole Atua, ina ia manino ai e le o taumafai le au Kerisiano e foua talitonuga faa-Roma i na onapo.

O loo fa'amuamua e Luka le asiasiga a le Alii i Nasareta ma ona sunako ile amataga o lana galuega.O ulua'i upu na tautala iai Iesu ina ua tagata matua, o upu sa ia faitauina mai tusitusiga a le perofeta o Isaia:"Ua i o'u luga le Agaga ole Alii, auā ua ia fa'au'u mai ia te a'u e folafola le talalelei i e matitiva" (Luka4.18).O le talitonuga o Luka, ole galuega atoa a le Alii o Iesu, sa taitaia e le Agaga Paia. "Ona amata lea ona fetalai atu o Ia ia te i latou, ole aso nei ua taunuu ai lenei Tusi o outou o fa'alogologo ai" (Luka 4.21)

E fa'asolo ina fa'aitiitia taimi e ta'ua ai le Agaga ile evagelia.E iai le taimi na fa'aalufale mai ai e Luka se tatalo ole fa'afetai a Iesu i upu fa'apea: "O lea lava itu aso ua matua fiafia ai o ia ile Agaga Paia" (Luka 10.21).E matua tele le 'ese'esega o lea tusitusiga ma le faiga e Mataio i lana ia tusi o le tatalo lava lea e tasi: "O lea lava itu aso ua fetalai atu ai Iesu" (Mataio 11.25).O le agaga o lenei tatalo e atagia ai le taua tele ia Luka.O mea ua faailoa mai e Iesu, ua le fa'aalia i e popoto ma atamamai ae ua fa'aalia i tamaiti.Ua fa'ailoa mai ai e Iesu le Tamā, aua ua na o ia na te silafia le Tamā, ma na o ia foi e na te fa'ailoaina mai le Tamā. Mo ia mea uma,e tusa ai ole molimau a Lu-

MAI A SAKARIA IA AKAPUSI: O LE AGAGA PAIA ILE EVAGELIA A LUKA MA LE TUSI O GALUEGA A LE AU APOSETOLO - FA'ALILIUINA LAUANO A. ILAOA

ka: “Olea lava aso ua matua fiafia ai o ia ile Agaga Paia” (Luka 10.21). O se tasi o ‘ese’esega o lo aliali mai lea ile Tatalo a le Alii ile Evagelia a Luka, aemaise o le fa’aupuga: ‘ ia oo mai lou malo’, lea ua suia ile fa’aupuga ‘ ia oo mai i o matou luga le agaga Paia e fa’amamaina ai matou’ (Luka 11.2). O le na tusia lea vaega e mautinoa sa iai lona manatu ua talafeagai lea fa’aupuga ma fetau lelei ma le faa-matalaina ole faamanuiaga e auala mai le Malo ole Atua, ma ole tatalo foi a le Alii e tatau ona iai se talosaga mo le meaalofo na folafola mai e le Alii mo le Ekalesia.

O le tasi vaega o loo taua ai le Agaga Paia, ole taimi na talanoa ai Luka e uiga ile Tama ma le “ ele sili ea ona foaiina mai e lo outou Tama o i le Lagi le Agaga Paia i e ole atu ia te ia?” (Luka 11.13). O le fa’aupuga lea a Luka e fa’atusatusa ile fa’amaumauga a Mataio ole Lauga a Iesu ile Mauga, o loo iai le fa’aupuga e fa’apea “e le sili ea ona foaiina mai e lo outou Tama oi le lagi o mea lelei i ē ole atu ia te ia?” (Mataio 7.11). Ae peitai, e faataua pea e Luka le galuega a le Agaga Paia i lona taua, ‘o mea lelei uma lava e foaiina mai e le Agaga ole Atua’

O le fa’aupuga faigata i le Luka 12.10, lea e tali tutusa ma Mareko 3.29 ma le Mataio 12.32, o loo taua ai ‘o se lafo se upu ile Atalii ole Tagata, e faamagaloina lea, a o lē faifai ile Agaga Paia, e lē fa’amagaloina lea”. O mea uma e talanoa iai Luka e faigofie ai ona manino ma malamalama i lenei fa’aupuga faigata ma lavelave. Talu ai o le Agaga Paia i le taofi o Luka ole ogatotonu moni lea ole fa’aolataga, o lona uiga o le tau faifai ile Agaga, o le te’ena lea o lona fa’aolataga. O le taumafai e ave mo Satani le galuega a le Agaga Paia, o le musu lea ile fa’aolataga ma le te’ena ole tulafono ole fa’amagaloga.

O se iloiloaga fa’ai’u ole Agaga Paia e Iesu, e tatala ai manatu fa’aletala’iga. I le mataupu 12.12 ole evagelia a Luka, o loo folafola manino mai ai e Iesu pe a feagai le au fa’atuatua ma taimi o puapuaga ma ni sauaga: “auā e a’oa’o le Agaga Paia ia te outou i lea lava itu aso i upu e tatau ona fai atu ai” E iai foi se folafolaga fa’apea o loo maua ile mataupu faa-apokalifa ole

Evagelia a Mareko: “aua e le o outou e fai atu, a’o le Agaga Paia” (Mareko 13.11), ma le tusi a Mataio 10.20: “ao le Agaga o lo outou Tama e tautala mai ai i totonu ia te outou”. E tutusa nei tusitusiga uma le taua o le feau o loo fa’amauiina ai ao le Luka 12.12 o lo’o aofia ai vaega taua e tapena ma sauniuni ai mo uiga ma meaalofo a le Agaga ile tusi ole Galuega a le Au Aposetolo.

Ua faa’iu le vaega e uiga ile Agaga Paia e pei ona ta’ua ile Evagelia a Luka, ae peitai, o Iesu Toetu na ia toe fa’aata le Agaga Paia i lana saunoaga i lona au so’o “Fa’auta foi, ou te auina mai ia te outou lē na folafolaina e lo’u Tama” (Luka 24.49). O le Galuega 1.2 o loo taua ai le a’oa’oga mulimuli a Iesu ile au so’o : “e auala ile Agaga Paia” ma na toe saunoa foi Iesu ile folafolaga ile 1.4 ma ia fa’apea ai: “e papatiso ina outou ile Agaga Paia, e le tele ni aso e va a’i ” (1.5). Sa toe taua e Iesu le folafolaga lenei ao lei si-ittia a’e o ia ile Lagi. “Ole a maua e outou le mana ole Agaga Paia pe a afio ifo le Agaga Paia iluga ia te outou” E le o se mea e fa’ate’ia ai le tele o fa’aupuga e uiga ile Agaga, ole folafolaga ma le mana ile amataga ole tusi o Galuega a le au Aposetolo.

(Fa’auau ile lomiga e sosoo ai)

FAFINE O EVAGELIA

ELISAPETA – FA’ATUATUA I LE ATUA – (FA’AAUUA MAI LOMIGA TALU AI)

Luka 1: 5 – 25, 39 – 45, 57 – 66 – O le Mataupu lea ma fuaiupu e ao ona faitau muamua.

O Elisapeta o se fafine iloga tele, ona o lana talitonuga na fanau mai ma ia, fa’apea vaega fa’alelotu na ia au-sia. Ae le’i foliga mai na fa’apea ai. O Elisapeta ma lona to’alua o Sakaria, e o mai uma i le laina

fa’aositaulaga a Arona , le uso o Mose. “Sa amiotonu i la’ua uma” (1: 6), ua fai mai ai Luka – ua pau lea o le taimi ua fa’amatala ai fa’apea se fafine i le Feagaiga Fou. O lona uiga e le fa’aitiitia lona fa’atuatua i lo-lona to’alua, sa fa’atuatua tele ma sa fa’aetetete ma fa’amaoni i le tausiga o le Tulafono. Ae na ta’u leagaina (1: 25) ona ua le fanau, ma o ona fa’amoe-moega mo se fanau na fa’asolosolo ona uma atu a o

fa’asolo ona matua o ia. A leai se alo, o se fafine i na vaiatau e gaogao toe alofagia. Ae ui i lea, e ui i lena tulaga sa i ai, ae sa faia pea e Elisapeta e pei ona iloa ai o ia: sa fa’atuatua pea i le Atua.

A o fa’aaauu e Sakaria lona taimi e faitaulaga ai i le Malumalu, sa tau’ave pea e Elisapeta le paganoa ua na o se tali i ana tatalo. Ua leai se taimi. Ina ua sau i fafo lona to’alua mai le satuaria, ua gūgū ma gegogego mai, ua manatu Elisapeta pe aiseā ua sau ai le tali a le Atua i se ‘auala fa’alilolilo fa’apea. E pei o Eva, na iloa e Elisapeta le fa’atonuga a le Atua mai lona to’alua, o ia sa fa’alogo o tulei sa’o mai – Atamu mai le Ali’i, ma Sakaria mai le agelu. Ae o le taimi nei o le fafine o le a ta’ita’ia le ala i le fa’ataunu’uina ma le kalasia. Sa vave ona talitonu Elisapeta ma fa’apea atu, “Ua fa’apea ona faia e le Ali’i iā te a’u i ona aso ua silasila mai ai o ia, e ‘ave ‘ese ai lo’u luma i tagata” (1: 25)

I se fa’aaliga ia Maria, na fa’amausalī e le agelu le tatalo o le vivi’i a Elisapeta ma fa’apea mai ai, “Auē e leai lava se mea e tasi e lē mafaia e le Atua” (1: 37). Ua na o Luka e feso’ota’ia Maria ma Elisapeta e aiga. Ae o la ma’itaga ua feso’ota’i ai nei fafine e leai se feso’ota’iga fa’aletino po’o le toto na faia muamua. Ua toe fa’auiga mai e Luka noanoatia fa’aleaiga ua fa’avae lea i luga o le fa’atuatua e tasi. E pei o Elisapeta, na va’aia e Maria lona ma’itaga o se fa’ailoga o galuega matagofie a le Atua i lona olaga. O le tali a Maria i le fe’au a le Atua na fa’ailoa mai e le agelu o se tasi nei o agalelei atu i isi: na fa’avavevave atu Maria e ‘au atu ma Elisapeta i le fa’afetai ma le fa’ataunu’uina o folafolaga a le Atua i o la olaga.

Ma leisi, o nei fafine e to’alua na fa’aaauu e pei o ni perofeta, lona uiga, o tagata ua mafai ona fa’amatalaina le finagalo o le Atua mo la’ua ma isi, ma na fa’anaunau e fa’atino loa i o la’ua olaga. Na “Ua tula’i Maria...ua fa’atelevave atu (1: 39) e fa’afetai atu iā Elisapeta e patipatia o la matafaioi i fuafuaga a le Atua. “Ua alaga ma le leo tele,” ua fa’ailoa atu le fa’atuatua o Elisapeta i le alo a Maria a o feiloa’i atu iā Maria le “tinā o lo’u Ali’i!” (1: 42, 43). Ae mea ane e le’i fa’atonuina e lona tinā, o le pepe a Elisapeta i lona manava ua fa’aopopo upu lē leoa, ua osooso i le fiafia i maitauina atu o le i ai o le Ali’i ma i latou. O lana asiasiga iā Elisapeta ua lē na o se fa’atinoga o le alofa fa’aletagata, ona na solomuli Maria ina o le a fanau Elisapeta, i le taimi na atagia mai ai le mana’omia tele e lona aiga le i ai i lea taimi ma lana lagolagosua. O le asiasiga o le tolu masina a Elisapeta ma Maria na avea o se va’aiga fa’aperofeta e fa’ailoa ai lo la’ua tūtū fa’atasi ma o la’ua alo mo le fa’aolagata o le lalolagi. Ua la maitauina le sau o le Mesia, ma na la fiafia ma olioli ona ua avea i la’ua o ni mea faigaluega a le Atua.

Ua fanau le tama a Elisapeta ma fa’aigoa e pei ona fa’atonuina e le agelu iā Sakaria, o le a ta’ua iā Elisapeta, “e igoa lava o ia iā Ioane” (1: 60). Ele’I toe au-

maia e Luka se fa’amalieina na lagona e Elisapeta i mea uma na tutupu, e ui sa ia iloina i lona fa’atuatua o le a tutupu. E ui na fa’ai’u le tala a Sakaria i le fanau mai o Ioane i le pese o le fa’amanuiaga, o le fa’atuatua malosi a Elisapeta o lo’o alia’i mai. Sa fa’apopoleina le tele o tua’oi sa masalomia fa’amoemoe a Elisapeta o le a taunu’u po’o o le a to o ia ma na sa’o lelei i le fa’aigoaina o lana tama. O lea ua latou fa’aogaina mea na tutupu i lenei fafine ma iloa “ua iā te ia le ‘a’ao o le Ali’i” (1: 66) ua fa’atasi ma ia fa’apea le tamaititi sa latou manatu e le fanau mai. A o avea le upu ma tino na tautala ai le agelu iā Maria, na mou malie atu Elisapeta, e pei o lana tama i le taimi na amata ai le galuega a Iesu

O le Fa’afitauli o le Lē Fanau

Ua a’afia Elisapeta i se vaega o fafine ma se laina maoa’e a le Feagaiga Tuai o tinā sa afaina i le amata mai ona o le lē fanau: Sara, Rasela ma Hana, le tinā o Samuelu, pe a va’ai i nisi o latou ia. Sa va’aia o se fa’aletonu fa’anatura, o le lē fanau o se fa’afitauli tele lea i se fafine, ona a leai se fanau ua leai fo’i sona lumanai. O se fa’afitauli fo’i fa’aleaganu’u mo le soisaiete atoa, aemaise o talitonuga fa’alelotu na tu’u fa’asolo mai i lea augatupulaga i lea augatupulaga. O tagata anamua sa itiiti lava le malosi e pulea ai lo latou lalolagi i na vaiatau ma sa manatu sa fa’amoemoe tele i le Atua ma le agalelei o le Atua mo latou i mataupu tau i le ola ma le oti. O le lē fanau, e pei o le oti lava ia, sa va’ia o se fa’ailoga o le lē “malie” o le Atua ua na o le Atua e mafai ona ave’esea. O vaila’au sa masalomia, o ni galuega fa’apaupau ua tu’ufa’atasia ma mea maneta, o laula’au, ma upu ua tolaulau i tagata ua vaivai ua fai atu o latou ola. O tagata amiotonu Israelu ua fa’asaga a latou tatalo i le Atua pe a feagai ma fa’ama’i po’o ni tulaga e pei o le lē fanau, fa’amatala atu ai le tu’uina atu o latou ma le mauualalo i le finagalo o le Atua. O le vavega i le fa’alavelave a le Atua ua na o se mea e fa’amoemoe i ai, ona o le ‘au matitiva ma latou e mana’omia – o se fa’amatalaga lea mo se fafine ua lē fanau – ua leai lava se isi auala ae ua na o le Atua.

Ua Fa’amanatuina e Tususiga Pa’ia Galuega a le Atua i o Tatou Olaga

O le fa’ata’ita’iga o Hana (1 Samuelu 1 – 2), ma ana loimata maligi ma le tatalo tauanau, ua fa’ailoa mai ai le tagi a le fafine ua naunau tele e fia fanau maia ni fanau. Ae mo le tāua o le loto tele ma le fa’amoemoe a Hana i le tausiga a le Atua o le fa’aleleia lona fa’afitauli pe a talosaga. E fa’apea fo’i Elisapeta o se fafine o le to’a ma sa fa’aalia lona fa’atuatua atoa i le Atua.

Ae o Maria na liua lagona a Hana ma isi fafine Israelu i se ituaiga o tatalo mo le ‘au talitonu i taimi uma. I lana Pese (Luka 1: 46 – 55), ua pese ai Maria i le fesuia’iga o lo’o patipatia i le malo o le Atua: Ua tulei ifo e ia o ali’i nai o latou nofoali’i, a ua fa’aeaina e ia o ē fa’amaualalo, ua fagina e ia i mea lelei e sa

ELISAPETA – FA’ATUATUA I LE ATUA – (FA’AAUUAU MAI LOMIGA TALU AI)

fia ‘a’ ai, a o e mau mea ua aufuaina atu e ia. Ua avatu e Maria se leo i le maofa o le ‘au matitiva ma latou ua fa’agaloina: Ua fa’aalia e le Atua se alofa fa’apitoa mo latou, tali atu i o latou mana’oga ma a latou tatalo. Na tu’u fa’atasia e Elisapeta ma Maria o la malosi ma o la lumana’i, pese i mea uma na faia e le Atua mo la’ua ma le to’atele o isi, i lo latou matitiva ma le mana’omia, fa’alagolago ua na o le Atua. I le la feiloa’iga, ua tatou maua mai ai se fa’ata’ita’iga uiga ‘ese o le fa’aogaina o le Tusi Pa’ia e patipatia ai galuega a le Atua i o tatou olaga. Ua tatou feso’ota’i atu i le tele o ali’i ma fafine i luma atu o i tatou sa tagiaue ona o le to’esea ma le nofo to’atasi, ua fa’amatala lo latou fa’amoemoega i le Atua, patipatia lo latou fa’atuatua ma le mautinoa e lē tu’u lafoa’ia i latou e le Atua, ma vivi’i atu i le Atua o le avanoa ua latou ‘au ai i le misitelio o le fa’aolataga.

O le Osooso i le Fiafia

O le tele o fafine, afai o la e fuafua e fanau mai se pepe, o le a musu e fa’atopetope atu i luga o se a’ega mo asiasiga ona o le lalofa. O le a fa’apea mai e i ai le tute tauave mo latou lava ia ma le pepe e le’i fanau mai e ao ona fa’amuamua i lo isi lava mea.

O le tinā o le Atua sa le manatu i ia mea fa’apea. O lea o le a fanau mai fo’i e Elisapeta se pepe, ma e ao o le alo o Maria o le Atua, sa le galo iā ia le mana’o a Elisapeta – ua maoa’e mo tatou, ae o le uiga lava o ia.

Sa feiloa’i atu i lona tausoga o Elisapeta, ma i le fa’alogo atu i lona si’uleo, sa osooso ma le fiafia Ioane i le manava o lona tinā. “Ua ou sau, fai mai ai Keriso, ‘ina ia latou maua le ola, ia maua atili ai lava’. E o’o lava e le’i fanau mai ae sa maua lava le ola i lona afio ai. O a la ni a’a o le fiafia ua tatala mai e lenei tala ia Keriso. Muamua o le foafoaga o le tamaititi i le agaga o le tamaititi, ona soso’o ai lea ma lenei fa’afeiloa’iga, o se tamaititi pepe ua osooso i le fiafia i le manava o lona tinā, ma le iloa le Keriso o lo’o natia ma oso mai ai i le olaga nei. Na fa’apeafea ia Elisapeta ona iloaina

le mea ua tupu ia Maria? Na fa’apefea ona ia iloaina o lenei tausoga la’ititi e masani lelei iai o le tinā o le Atua? Sa ia iloaina mai le tamaititi o lo’o i lona manava, i le fa’avavevave i le olaga o le osooso lea i le fiafia. A tatou faia lenei manatunatuga ua a’oa’o mai e lo Tatou Tinā, o le a tatou maua le lagona na o’o i ai o ia.

Afai o lo’o tuputupu a’e Keriso i totonu o i tatou, afai o tatou maua le filemū, manatuaina, ona ua tatou iloaina e foliga mai e lē tāua o o tatou olaga, ae mai ai i’iā, ua Ia fausia o ia lava; afai tatou te o ma le loto fa’anaunau, i le “fa’anatinati”, po’o fea lava o tatou tulaga ua fa’amalosia i ai i tatou, ona tatou te talitonu ua iā Ia fa’anaunau ina iai i lenā nofoaga, o le a tatou iloaina ua fa’aosofiaina i tatou ina ia faia ona o lona alofa.

Ma o le tali o le a tatou maua mai i isi i na fa’aosofiaina o le a fa’ate’ia i le ola po’o o le a osooso i le olioli i le olaga ua fafaguina i totonu o i latou.

SAGATO BEDE LE PA’IA (OSITAUAGA MA LE FOMA’I 672 – 735)



O Bede o se tasi o Sagato ua fa’amamaluina e pei ona i ai nei fa’apea le taimi o lona olaga. O ana tusinga na fa’atumulia i le fa’atuatua ma a’oa’oga a o soifua mai lava o ia, sa poloa’ia e se Komiti a le Ekalesia ina ia faitau i nofoaga fai tele e pei o falesa.

A o la’ititi o ia sa tu’uina atu i le va’aiga a le ta’ita’i a le monasera a Sagato Paulo, o Jarrow. O se mafutaga fiafia a se atamai fa’atasi ai ma a’oa’oga monike pa’ia ma le fa’asikolasipi, na fua mai ai i se sagato ma se tagata atamai maoa’e tele, masalo o se tagata tulaga maua tele i a’o’oga i ona taimi. Sa loloto lona malamalama’aga i mataupu fa’asaenitisi o ona taimi: mataupu tau filisofia, o a’oa’oga a Aristotle, mataupu tau i le fetū ma le vāteatea, numera, tusinga, tala’aga fa’alelotu, o olaga o Sagato ma Sagata, aemaise le Tusi Pa’ia.

Mai le taimi o lona fa’au’uina ma avea ma ositaulaga i le 3o o ona tausaga (na fa’au’u ma Tiakono i le 19 o tausaga) se’ia o’o i lona maliu, sa fa’atumulia ona taimi i le su’esu’e, o tusinga ma a’oa’oga. E le gata i le tele o tusi sa ia

fa'aogaina, sa ia tusia le aofai e 45 e ia lava, e 30 sa tu'utō i le fa'amatalaina o le Tusi Pa'ia.

E ui sa mana'omia tele e tupu ma tagata mauululuga o le malo, e o'o lava iā Pope Sergius, sa nofo mau pea Bede I lanai a Monaseli se'ia o'o I lona maliu. E la'ititi lava sina taimi sa tu'ua ai e ia le nofoaga ae alu atu e a'oa'o I se a'oga a le Akiepipoko a York.

Na maliu Bede i le 735 a o tataloina lana tatalo pele:" O le vi'iga i le Tamā, ma le Alo, ma le Agaga Pa'ia. E pei o lona vi'iga sa i le amataga, fa'apea fo'I ona po nei, ma aso uma e fa'avavau."

O lana tala fa'asolopito fa'a Ekalesia o Tagata Egelani ua va'ava'ai I ai o se faiga taūa tele I mataupu tau saienetisi ma tusitusiga o tala fa'asolopito. O se tausaga fa'a'auro ua fa'asolo ona uma I le taimi o lona maliu: ua fa'atumulia lona mafua'aga o le tapenaina o Kerisiano I Sisifo ina ia fa'aofi mai tagata fa';apaupau Roma mai Matū. Na iloa e Bede se amataga fou ua tatala I le olaga ole Ekalesia ae le'I taunu'u mai.

O LE VAVAE'ESEINA O LE PAPATISOGA – I LE VAI MA LE AMATAGA O LE KOFILIMASIO

(FA'AAUUAU MAI LOMIGA TALU AI)

O se tasi o fa'aupuga e uiga i le kofilimasio i nei tusitusiga na sau mai iā Urban, o se pope o le tolu seneturi.. Ua folafola maia 'o le 'au fa'atuatua uma e tatau ona talia le Agaga Pa'ia i le mae'a o le papatisoga e ala lea i le fa'ae'e o lima a le epikopo ina ia avea ai ma Kerisiano atoatoa.' O le isi tusitusiga mai ia Melchiades, e fa'apea 'i le papatisoga ua tatou fanau ai i le ola fou, i le mae'a ole papatisoga ua fa'amausalī ma fa'amaonia mo le taua. I le papatisoga ua fa'ama-mā ai i tatou, i le mae'a o le papatisoga ua fa'amalosia i tatou (Martos, p.216). O nei tusitusiga na talia e moni ma na tele le a'afiaga o le malamalama'aga aloa'ia se'ia o'o atu i le Vatikanano II.

O le Kofilimasio na mua'i va'aia i Sautesasa'e o Gaul i se lauga o le Penetekoso a Epikopo Faustus o Riez (450 – 470). I le amataga o le upu e le o se fa'aupuga o le fa'amalosia ae o se feso'ota'iga ma a'afiaga o le epikopo : e sau le epikopo ma fa'amausalī ma fa'atinoina le sauniga o le fa'aulufale ma avatu le fa'amaoniga. O le fa'aogaina aloa'ia o le upu kofilimasio na maua i le Fonotaga i Riez i le 439, ma fa'apea le Fonotaga i Orange i le 441.

O se vaega o le lauga a Faustus na avea ma mafua'aga o telosia a le vaitau o tausaga ogatotonu ma le a'afiaga i totonu o ni tusitusiga fa'alelotu e lē moni fa'atasi ai ma nisi o galuega fa'akanone a pope Urban ma Melchiades ma na mana'omia se fa'amalosia aga'i i le lalolagi, ua fa'aauppegaina mo le taua, o lo latou lea 'tupuaga i le kalasia.' Na tusi e Faustus o le a fa'alua ona afio ifo le Agaga , i le papatisoga ma le fa'ae'eina o lima a le epikopo. O nei faiga e lua e maua ai e lē o lo'o

talia se malosi fou.

O le telosia na mafua mai i a'oa'oga o le isi lea fa'amatalaga tele o le sakalameta o le kofilimasio. I le ogatotonu o le seneturi sefulu na fa'ailoa mai e le ofisa a le pope o le kofilimasio o se vaega e 'ese. Na amata ai loa e 'au a'oa'o telosia ona amata mai le tulaga e fa'apea o le kofilimasio o se sakalameta ma o la latou lea galuega o le fa'amatalaina o lona uiga ma lona natura. O le vaega taūa tele ole sauniga o le fa'asuā'uina o le muauulu i le suau'u manogi. Ae o se va'aiaga 'ese sa alia'i mai, o upu sa fa'aoga sa le'i talafeagai ma tāga sa fa'aoga. O Viliamu o Auvergne (1180 – 1249) sa finau o le Agaga Pa'ia e le'i avatua i le kofilimasio ona ua uma ona avatu i le papatisoga ma o le tatalo ua na mo le vi'iga o le Agaga Pa'ia. O le manatu o le malosi ua amata ona tuputupu a'e lona taūa i le malamalama'aga i le kofilimasio, o le foa'iina atu o le Agaga o se meaalofa ua amata ona faifai malie atu ma o se suiga o le kalasia fa'asakalameta ua alia'i mai. O Bonaventure i Breviloquium sa tusia se galuega o le kofilimasio o se *con – firmatio* po'o le fa'amalosia o le Kerisiano ua papatisoina ina ia avea ma fitafita tau.

O le papatisoga sa fa'atusaina i le toe fa'aolaina ma le fa'amausalīina ma le fa'ateleina o le kalasia. Ona o le kofilimasio e lē fa'aluaaina ona fai, ua manatu e i ai lava lona ia natura ae sa i ai ni fe'ese'esega malosi i lona 'ese mai le papatisoga ma po'o afea na fa'avae ai e Keriso, po'o le 'au Aposetolo, po'o le Ekalesia. I ni taimi o le 'mataupu' o le sakalameta na avea ma fa'au'uina i le suau'u faia le fa'ailoga o le koluse ma upu e

O LE VAVAE'ESEINA O LE PAPATISOGA – I LE VAI MA LE AMATAGA O LE KOFILIMASIO

(FA'AAUUAU MAI LOMIGA TALU AI)

fa'aoga: 'ia e talia le fa'amau – fa'ailoga o le meaalofa a le Agaga Pa'ia ma fa'amausali oe i le suau'u ole fa'aolataga,' o le seneturi e sefulu lea ma na mulimuli ane na fuafuaina o le ute lea o le sakalameta.

O Tomasi Aquinas na ofoina mai le telosia mautu muamua o le kofilimasio. O le manatu o le fa'amalosi ma le matua lelei na fa'avae ai ona manatu, e pei ona ia fa'amatala le i'uga o le tagata ua uma ona kofilimasio i lona mafai ona folafola mea fa'aleagaga ma le mautinoa. I lana *Summa Telosia* sa ia tusia i le malosi e tauave ai mea totino i le tauiviga fa'aleagaga aga'i fili o le fa'atuatua.

Mo Tomasi Aquinas, o le kofilimasio ua maua mai ai le malosi fa'aleagaga e molimau ai i le fa'atuatua ma le Eukalisitia e fafaga ai le tagata i le olaga nei. Sa ia malamalamaina le papatisoga o le la'asaga muamua o le malaga. O mea ta'ua o le vai ma upu fa'atasitolu, 'Ou te papatisoina oe i le suafa o le Tamā, ma le Alo ma le Agaga Pa'ia. O isi sauniga uma ma fa'ailoga sa masani o ni vaega o sakalameta ua le ta'ua ma ua le toe fa'aogaina. O le natura fa'apapatisoga ua avatu ai i le tagata le malosi e vivi'i lelei ai i le Atua ma, ina ia fa'aoga lelei lona malosi, e ao i le tagata ona 'au ai fa'atasi i galuega fai a le Atua.

I le tausaga 1274 le Fonotaga Lua i Lyons na fa'aailoa ai le kofilimasio o se tasi o sakalameta e fitu a le Ekalesia Katoliko. I le 1280 i le Fonotaga i Cologne na fa'aailoa ai o tamaiti e i lalo ifo o le fitu tausaga ua laiti tele mo le kofilimasio. O isi Fonotaga na fa'atulagaina le taliaina o le kofilimasio i le 12 po'o le 14 tausaga. O le Fonotaga i Florence i le 1439 na fa'aailoa ai o le kofilimasioina ua tuputupu ai Kerisiano i le kalasia ma ua fa'amalosi i le fa'atuatua; (o tāga ma gaioiga ua fa'aoga i le sauniga) i le kofilimasio o le fa'au'ui-na i le suau'u ma upu sa fa'aoga i le taimi o le sauniga; o le ta'ita'i masani o le sakalameta o le epikopo, ona i le Feagaiga Fou na o aposetolo na avatua le Agaga Pa'ia i le fa'ae'eina o lima. I taimi o fa'alavelave fa'afuase'i e mafai e pelepitelo ona fa'atinoina le sauniga, ae ia fa'aoga le suau'u manogi na fa'apa'iaina e epikopo.

E o'o atu i le taimi o le Fonotaga i Trent ua avea le kofilimasio o se sauniga ua vavae 'ese mai le papatisoga ona o le taliaina o le manatu o le 'tausaga o le mafua'aga' mai le seneturi sefulu

tolu. Na fa'amausali le tulaga o le kofilimasio i Trent i le fa'amatalaina aloa'ia i le 1547. O le *Katesimo* a Trent (1566) na fa'amatala ai le fa'asologa e pei ona i ai nei, papatisoga, kofilimasio ma le Ulua'i Komunio, e ui lava o le fa'atinoina sa 'ese'ese. Sa fa'amatala e Trent le kofilimasio e i ai lona natura fa'asakalameta, ae le'i mafai ona fa'apea mai po'o le a lona natura, ae ua na o fa'apea mai e feso'ota'i ma le papatisoga: Afai e i ai se isi e fa'apea mai o le fa'amausalina o se ua papatisoina o se sauniga e leai sona aogā ma e lē o se sakalameta moni ma sa'o; po'o se taimi e leai sona uiga ua na o se a'oa'oga fa'akatesinmo mo latou ua latalata o ni tupulaga ma e avatu se fa'amatalaga o lo latou fa'atuatua i luma o le Ekalesia: ua tumu o ia i le ita. Ua fa'atulaga lelei e le tulafono a le Ekalesia le uiga ma le nofoaga o le suau'u manogi i le sauniga o le kofilimasio ma o lo'o manino mai le kanone 710 o le ta'ita'i masani...o le epikopo ae lē o so'o se faife'au'. O le fa'aogaina aloa'ia o le upu kofilimasio sa i le *Castellani Pontifical* o le 1520.

I le tausaga 1910 na fa'atonuina ai e Pope Sagato Pio X ina ia talia e tamaiti le Komunio pe a o'o atu i le 'tausaga o mafua'aga,' ae leai se tala e uiga i le taliaina o le kofilimasio i luma mai. O le mafua'aga lea o le faiga o lo'o i ai nei i isi nofoaga o le papatisoina o le pepe, ulua'i komunio i le fitu po'o le valu o tausaga ma le kofilimasio i le vaitau o le talavou, e ui lava sa 'ese mai ai i le Tulafono Kanone o le 1917.

TULIMANU O AOGA ASO SA



TALOFA LAVA.

Matou the faatalofa ma faafeiloai atu i lo outou Paia ma le mamalu o aoga Aso sa a le Kapelanisia. Ole Aoga Aso lenei a le Finagalo Paia i Petone Le Palisi ale Agaga Paia- Te Wairua Tapu. Mo lenei tausaga sa amataina le aoga Aso sa ia Fepuari ma e 29 a matou tamaiti amata mai ile preschool se ia oo atu ile Year 13. E faia a matou aoga asosa i aso sa taitasi pe a maea le Misasa ole 930am. O a matou auunaga i la matou palisi e aofia ai le peseina ole Misasa ole 930am ile aso Sa muamua, o fanau ua maea ona uluai komunio e tali misasa ma fesosoani e faia training mo tamaiti e fia faia lea auunaga. I le aso sa Lua ole Paseka sa faataunuuna ma tapenaina e le fanau aoga aso Sa auunaga uma mo la matou Misasa Samoa muamua mo lenei tausaga. O la matou manulauti tauave."Ina ia tapue, faafailele ma fesosoani i fanau a la matou Ekalesia ina ia faaoloaina pea i latou ile fiafia e mafuta ma aoaoina le faatuatuaga Katoliko i la latou gagana Samoa. E faaogaina pea lava gagana e lua (Samoa/English i taimi o vaega.. E tatala lava foi le avanoa i fanau a la matou palisi pe a manaomia lenei auunaga. Matou te amanaiaina tele le galulue faatasi ma matua o fanau aoga, la matou Ekalesia pele ae maise la matou palisi. Manuia tele le toe foi atu o fanau aoga i le amataina o le kuata muamua . O tatou o tagata ole toetu aleluia. O loo tatou faimalaga, galulue ma tulimatai se faamoemoe ma se taunuuga Aleluia. Faafetai lava mo lo matou avanoa..

MALIA Taito- Taitai Aoga Aso Sa



ASO 5 ME ASO SA TOLU O LE PASEKA:

Faitauga muamua: Galuega 5: 27 – 32, 40 – 41. Matua: O ana molimau i ia mea o i matou, atoa fo'i ma le Agaga Pa'ia, lē ua foa'iina atu e le Atua i e 'ana'ana iā te ia.

Salamo: 30: 1, 3 (tali), 4 – 5 (tali), 10 – 12 (tali). Tali: Le Ali'i e, 'ou te vivi'i atu iā te oe, auā ua e fa'aeaina a'u.

Faitauga lona lua: Fa'aaliga 5: 11 – 14. Matua: Ua tatau lava le Tama'i Mamoe na fasia ina ia tu'uina atu iā te ia le mana, ma le oa.

Aleluia, Aleluia... O a'u nei o le leoleo mamoe lelei, ua 'ou iloa a'u mamoe, ua iloa fo'i a'u e a'u mamoe... Aleluia.

Evagelia: Ioane 21: 1 – 19. Matua: Ua maliu ane Iesu, ua tago i le areto, ma avatu iā te i latou; ua fa'apea fo'i ma le i'a.

Tofitofiga o le Upu:

O faitauga o lenei aso Sa ua ta'ita'ia ai i tatou e mafaufau i le manatu o le agava'a. O Peteru ma isi so'o na "alagatatau ona puapugatia i le fa'alumaina ona o le igoa" o Iesu ma Keriso lava ia, le tama'i mamoe, ua fa'ailoaina e agava'a "ona talia le mana ma le 'oa, atamai ma le malosi, le mamalu ma le fa'aeaea ma fa'amanuiaga." O le mea ua o gatasi ai Pateru ma Iesu, e le gata o le agava'a, ae o le fa'avae o lenā agava'a. O le a le mafuaga o le agava'a o Peteru ma le 'au aposetolo? O le usita'i i le Atua. O le a le mafua'aga o le Tama'i mamoe – na fasia e agava'a? Usita'i i le Atua.

O le fa'afitauli mo aposetolo na amatalia ina ua latou fa'amaloloina le pipili ona fa'ailoa lea na faia i le suafa o Iesu, lea na fa'akoluseina e ta'ita'i, na fa'amaloloina le tagata (Galuega 3:1 – 26). E lē o nofo lelei lea i ta'ita'i na toso maia Peteru ma isi ma fa'atonuina e 'aua le tala'ia Iesu. O le tali a Peteru ma Ioane e maoa'e: "Auā ma te lē mafaia ona lē tautala i mea ua ma va'ai i ai ma fa'alogo i ai" (4: 20). Ma na fa'aigaina lea manatu fa'atiute i le tatalo i le Atua e fesoasoani iā i latou e fo'ia le fefe po'o le tautala'ia ma taofiofi mai i latou i le fa'atinoina o nei mau.

O lo'o iloa lelei e le 'au aposetolo o latou o lo'o mulimuli i tulaga vae a Iesu, ma ua mailoa le mea o lo'o aga'i i ai na tulaga vae. I le Evagelia, na lapata'i e Iesu Peteru o le fa'atinoina o ona tiute o le a o'o mai ai le oti, e pei o Iesu (O le mau a Kerisiano na fa'akoluseina Peteru i Roma i le 64 AD, i taimi o fa'asauaga a Nero). I le matafaga o le vai, ua vala'auina Peteru ina ia fa'afaga mamoe a Iesu, o le fa'aaliga o le alofa o Peteru iā Iesu, fa'amaualā ai lona fa'atuatua, taumauga, ma le usita'i i le Ali'i toetū. O lenā alofa mo le lelei o le Ekalesia, ma le mamalu o le Atua, ae o le a sau ai ma puapugatia ma le oti. Ona o le maliu o Iesu e lē o le gata'ana, e lē o le muta'aga fo'i lea mo Peteru po'o ai lava e mulimuli iā Iesu i le usita'i, fa'amaoni ma taumauga i le Atua. Afai e puapugatia ona ole lalolagi nei ona ua latou olaina le finagalo o le Atua, ma onosa'i e ala i meaalofo a le Atua, o lo latou agava'a o le a manino i tagata uma, a lē o lenei lalolagi, ona mautinoa lea i le lalolagi o le a sau.

Metitasio Aso Sa 5 Me 2019

E te alofa ia te au?

O ia lenei o le Alii, ua toe fa'aali atu i le au so'o ina ua mavae lona Toetu, ma fesiligia le Aposetolo o Peteru; ma fa'amalosia o ia fa'atolu e ta'uta'u atu lona alofa, auā na fa'atolu ona fa'afiti o ia i le fefe. Na toetu mai Keriso i la le tino, a'o Peteru i la le agaga; auā na maliu Keriso i lona Pasio, ae maliu Peteru i lana fa'afiti. Na toe fa'atuina Keriso le Alii mai le oti; a'o lona alofa na ia fa'atuina ai Peteru: Na ia fesiligia Peteru e uiga i le alofa sa ia ta'uta'u atu, ma talitonuina o ia mo ana mamoe. Mulimuli ane, o le a se aoga o Peteru e mafai ona avatu i le Keriso, e ala i le moni o lona alofa ia Keriso? Afai e alofa Keriso ia te oe, mo lou manuia, ae lē o Keriso; ae afai e te alofa ia Keriso, o lou manuia lea, ae lē o Keriso. Ae ui i lea, ua finagalo Keriso le Alii e fa'ailoa mai i tagata po'o le a le auala e tatau ona fa'ailoa atu ai latou te alofofa ia Keriso, ma na ia fa'amanoina e ala i le tu'uina atu o ia lava mo ana mamoe. *E te alofa ia te au?* Ioe. *Fafaga a'u mamoe* (Ioane 21: 15-17). O nei mea uma na faia i le taimi e tasi, i le fa'alua ma le fa'atolu. Sa leai se isi tali na faia e Peteru nai lo lona alofa ia te ia; sa lē fesili le Alii i se isi fesili; ina ua ia tali atu, na ia lē faia se isi lava mea, ae na ia tu'uina atu ana mamoe ia te ia

Ioe, ia tatou alofofa ia te ia, ia 'aua ne'i i ai se mea e sili ona pele ia i tatou nai lo ia. E te manatu ua lē fesiligia i tatou e le Alii? Pe na o Peteru ea ua agava'a i ai lea fesili, ae le'o i tatou? Pe a faitauina lea faitauga, ua fesiligia Kerisiano uma ta'ito'atasi i lona loto. O lea, pe a e fa'alogo i le Ali'i ua fetalai, *Simona le atali'i o Ioane, pe e te alofa iā te a'u?* Mafaufau i ai e pei o se fa'ata, ma tilotilo ia te oe lava. Ou te fai atu, o le a se isi mea na faia e Peteru nai lo le tu mo le Ekalesia? Ina ua fesiligia Peteru e le Ali'i, ua ia fesiligia i tatou, ua ia fesiligiaina foi le Ekalesia.

ASO 12 ME ASO SA FA O LE PASEKA:

Faitauga muamua Galuega 13: 14, 43 – 52. Matua: Ma te liliu atu i tagata o nu'u 'ese.

Salamo: 100: 1 – 2 (tali), 3 (tali), 5 (tali). Tali: O lona nu'u i tatou, ole lafu mamoe ua ia fagina.

Faitauga lona lua: Fa'aaliga 7: 9, 14 – 17. Matua: O le Tama'i Mamoe o lo'o i luma o le nofoali'i na te fafaga ia i latou, ma ta'ita'i ia te i latou i puna vai ola.

Aleluia, Aleluia...O a'u nei o le leoleo mamoe lelei; ua ilao a'u mamoe, ua ilao fo'i a'u e a'u mamoe...Aleluia.

Evangelia: Ioane 10: 27 – 30. Matua: Ou te avatu le ola fa'avavau i a'u mamoe.

Tofitofiga o le Upu:

A o tatou malaga i lenei vaiata o le Eseta, o faitauga i aso Sa ua fa'auau ona vala'auina i tatou e talatala le uiga ta'avalevale o meaalofoa a le Atua o le Ola Fou o le Toetū i o tatou olaga i aso ta'itasi. O faitauga e tolu o le aso Sa fa o le Eseta ua va'ai i ai i le sini masani – le 'ese'ese manino i le va o itu tete'e ma fa'amasinoga i le tasi va'ai, ma le alofa o le Atua i le isi.

I le faitauga muamua, o tagata Iutaia "ua latou fa'atupu le sauā ia Paulo ma Panapa, ma tutuli atu ia te i laua i lo latou tua'oi" (Galuega 13: 50). Ae le gata i lea e pei ona va'aia fa'atasi ai ma tagata o nu'u 'ese "ua logo atu fo'i le afioga ale Ali'i i lea nu'u uma lava" (Galuega 13: 49) ma so'o "ua tutumu i le olioli ma le Agaga Pa'ia (galuega 13: 52).

O le anoanoa'i o fa'aaliga a Ioane mai le faitauga lona lua mai le Fa'aaliga ua a'afia ai i latou sa puapuagatia ma 'O i latou o ē ō mai nai le puapuagatele (Fa'aaliga 7: 14), atonu o lo'o fa'asino lea i fa'asauaga i lalo o le pule a Nero (54 – 68 AD). I le tali atu ia i latou o le Tama'i Mamoe i luma o nofoali'i na te fafaga ia i latou, ma ta'ita'i ia i latou i puna vai ola; e soloi'esea fo'i e le Atua o loimata uma nai o latou mata" (Fa'aaliga 7: 17).

O le filifiliga mai le evangelia a Ioane e ao ona malamalamaina i le fa'atusatusa e Ioane i le "au faigaluega" e le puipuia ma va'aia leleia mamoe pe a sau le luga, ma Iesu le "leoleo mamoe lelei; e tu'u atu e le leoleo mamoe lelei lona ola e sui a'i mamoe (Ioane 10: 11) Ae o le faitauga o le asō, e malosi tele, ua toe ave mamao i tatou i le fa'amamafa maia o le alofa fa'apelepele ma le agalelei i le va o le leoleo mamoe ma mamoe – "ua ou iloa fo'i i latou" (10: 27) ma "e lē mafai lava e se tasi ona fao ia te i latou a'i ou lima" (10: 27) – o lo'o atagia mai i le mafana o le va o Iesu ma le Tamā – "o a'u nei ma le Tamā, e tasi lava i mā'ua.

O faitauga o le asō e lē o folafola maia o latou e tete'e o le a salu 'esea vave nei, e ui o lo'o i ai se fe'au taūa mo i tatou ina ia iloa pe fa'apefea ona tafi uma 'ese le pefu mai o tatou vae. O le Tusi Pa'ia o lo'o folafolaina mai ia i tatou le matagofie o le Atua a o tatou feagai atu i nei fa'amasinoga. O le Atua e alofa ma e tasi ia i tatou, e iloina i tatou ma e mana'o e opo atu i tatou i ona 'a'ao alofa.

Metitasio Aso Sa 12 Me 2019

Lagonaina le Si'ufofoga o le Leoleo Mamoe Lelei

O le leoleo mamoe e tu'uina atu atoa ia mo lana lafu; lona ola, o le tausiga, ma le va'aiga ua i o latou lima, ma afai ae lelei le leoleo mamoe, o le a leai se mea latou te fefefe ai i lalo o lana puipuiga, ma o le a leai foi se mea latou te popole ai. O Iesu o le mua'i Leoleo Mamoe Lelei: E lē gata o le alofa, fafaga, ma leoleoina ana mamoe, ae na te tu'uina atu foi lona ola mo i latou. I le misitelio o le Liutino-tagata, na afio mai le Alo o le Atua i le lalolagi e sa'ili mo i latou e pei o mamoe ua ta'asē, ua sē ese mai le lotoa mamoe ma ua leiloloo i le vanu pogisa o le agasala. Ua afio mai o ia o se Leoleo Mamoe alofa mutimutivale, ina ia mafai ona tausia lelei lana lafu, e lē fefe o ia e fefa'asoa'i ma i latou

Pe le'o se tu'ufa'atasiga ea ua sili atu ona lelei i le galuega atoa o le Fa'aolataga? E foliga mai e sili atu ona matagofie pe a tatou lagonaina Iesu o tautino mai: *Ua ou sau ina ia latou maua le ola ma ia maua atili ai pea* (Jn 10:10). O le mea moni, e mafai ona ia toe fai mai foi fa'alua ia i tatou ta'ito'atasi: *O le a se mea na ou faia mo oe ou te le'i faia?* (Isaia 5: 4). Oi, pe le'o lo tatou agalelei ea o le tu'uina atu atoa i tatou ia te ia e lē fa'atuaoia, e tusa ai ma le tulaga o lana foa'i i le ofoina mai o ia lava mo i tatou!

Ua toe fetalai foi Iesu: *Ua ou iloa a'u lava ma iloa foi a'u e a'u, e pei ona silafia a'u e le Tamā ma ou iloa foi le Tamā* (Ioane 10: 14-15). E ui lava e leai se fesili oi i ai pe tutusa, ae na o se fa'atusatusaga faigofie, ae matuā'i mafanafana lava ma vi'iga mo i tatou le iloa lelei le fiafia Iesu e fa'atusatusa lona so'otaga ma i tatou, ma i latou ua ia te ia ma lona Tamā. Na fa'apena foi i le Talisuaga Mulimuli, na ia fetalai ai: *E pei ona alofa mai le Tamā ia te a'u, o lea ou te alofa ai ia te outou*, na toe fetalai mai foi: *Tamā, ia tasi i latou i totonu ia i ta'ua, e pei o oe i totonu ia te a'u ma a'u i totonu ia te oe* (Ioane 15: 9, 17:21). O le mea lea ua fa'aalia i lo tatou le va, o mamoe ma Iesu, lo tatou Leoleo Mamoe, e lē gata o se so'otaga o māsāniga, ae o le tasi o le alofa, ae sili atu ai le mafutaga o le ola, lea e tutusa ma mea o lo'o i ai i le va o le Alo ma le Tamā. O le mea lea ua fa'aalia i lo tatou le va, o mamoe ma Iesu, lo tatou Leoleo Mamoe, e lē gata o se so'otaga o māsāniga, ae o le tasi o le alofa, ae sili atu ai le mafutaga o le ola, lea e tutusa ma mea o lo'o i ai i le va o le Alo ma le Tamā.

ASO 19 ME ASO SA LIMA O LE PASEKA:

Faitauga muamua: Galuega 14: 21 – 27. Matua: Ua ia fa'apopotoina le ekalesia, ma fa'amatalaina atu mea uma na faia e le Atua e i la'ua.

Salamo: 145: 8 – 9 (tali), 10 – 11 (tali), 12 – 13 (tali). Tali: Lo'u Atua e, le Tupu, 'ou te fa'amanu atu i lou suafa e fa'avavau fa'avavau lava.

Faitauga lona lua: Fa'aaliga 21: 1 – 5. Matua: E solo'i'esea e le Atua loimata uma i o latou mata.

Aleluia, Aleluia...O le poloa'iga fou 'ou te tu'u atu ai ia te outou; fa'apei ona 'ou alofa atu ia te outou, ia fealofani fo'i outou...Aleluia.

Evagelia: Ioane 13: 31 – 35. Matua: O le poloa'iga fou 'ou te tu'u atu ia te outou, ia outou fealofani.

Tofitofiga o le Upu:

Ua alu 'ese luta ona avatu lea e Iesu se poloa'iga fou i le 'au Aposetolo. E fou ona e le pei o poloa'iga tuai, o lo'o i ai ma Iesu lava ia. E aunoa ma le ola o Iesu e leai lenei poloa'iga, ae ona o le maliu o Iesu ua maua ai e lenei poloa'iga le tu'u fa'atasia. O le aloga o Iesumo ona Aposetolo ua tu'u fa'atasia e lona maliu, o se alofae le mafai ona fa'aitiitia e le te'ena ae maua lona fa'atumulia e lena te'ena. O le mafua'aga lena inau a alu 'ese atu luta na amatalia ai le gaioga na taunu'u i le maliu o Iesu, o lenei poloa'iga o le avatu i Aposetolo. O le Poloa'iga o se mea alofa. Na avatu e Iesu lenei poloa'iga, e le'i na ona fai atu i le avatua e Iesu o lana poloa'iga ua ia avatu ai o ia lava. O le mea alofa o le ola atoa, o le ola ua foa'i e aunoa ma ni tu'utu'uga.

Ua fa'amamaluina Iesu e lenei poloa'iga, ona o se poloa'iga ua tatala ai lona alofa i le lalolagi. A o aga'i atu le 'au Aposetolo i le fa'akoluseina, a o fa'aletonu i latou i tulaga fa'aletagata i le tali atu i lona alofa, ua saunia i latou mo se ituaiga o alofa fou. O lo latou le tali atu i lena alofa, ta'ito'atasi, amata mai ia luta, ua latou pau'u 'ese mai ia Iesu, ma le mailoa ai le loloto o lena alofa.

Na tautatala Paulo ma Panapai mea na faia e le Atua ia i latou, ae le o mea latou te le'i faia. Na tualanoa i le 'faitoto'a o le fa'atuatua', atonu o lo'o fa'asino i le faitoto'a o le Fale 'ie mo Fonotaga i le Tusi o Esoto, na fa'aailoa mai ai le Atua. Esoto 33.9: na fa'aali mai ai le Atua: *Ua ulu atu Mose i le fale 'ie, ona ifoifo ai lea o le ao fa'aniutu, ua tu fo'i faitoto'a o le fale 'ie; ona fetalai mai lea o le All'I ia Mose.*

Mai lena taimi o a'oa'oga Kerisiano ua le na o ni a'oa'oga ua tatau, ua le na o se manatu. O le mana a le Atua, na faia le alofa o Iesu – o se alofa e le mafai i tulaga fa'atagata – na avea ma alofa o le salalau i le lalolagi atoa. O lenei alofa na ulu atu i le faitoto'a i le lalolagi e ala atu i le maliu o Iesu le Keriso.

Metitasio Aso Sa 19 Me 2019

O le Poloaga o le Alofa

Afai ae leai sou alofa i le va ma lou uso-a-tagata; ona fa'apefea lea ona e alofa ia Keriso? E fa'apefea ona latou va'aia Iesu i totonu ia te oe? O le mafua'aga lena tatou te manaomia ai se loto mama, e iloa ai Iesu. Alofa le tasi i le isi. Na pau lena o le mea na afio mai ai Iesu e a'oa'o ai i tatou. E matua faigofie lava le Evagelia atoa. E te alofa ia te a'u? Tausi a'u poloaga. Na ia liliu ma felua'i i le mea lava lea e tasi: alofa le tasi i le isi. E finagalo o ia ina ia tatou matua alofagia....

O le alofa e le fuaina; e na o le tu'uina atu. Ina ia avea ma se aposetolo o le Finagalo Paia, e tatau i se tasi ona mumu i le alofa, tele le alofa mo ou tuaoi

O nei upu a Iesu, *Alofa le tasi i le isi, ia pei ona ou alofa ia te outou*, e le gata o se sulu mo i tatou, ae avea foi ma se afi mumu e fa'aumatia ai le manatu fa'apito lea e poloka ai le lauolaola i le olaga paia. Na alofa mai Iesu ia i tatou e o'o i le i'uga, i le tulimanu o le alofa: le satauro. O lenei alofa e tatau ona sau mai totonu, mai lo tatou fa'atasi ma Keriso. E tatau ona sasa'a atu lo tatou alofa i le Atua, i totonu o le aiga e tasi, se aiga fa'atasi ma le Tamā oi le lagi. O le alofa e tatau ona avea ma mea masani ia pei o le ola ma le mānava, i lea aso ma lea aso se'ia o'o i le oti.

ASO 26 ME ASO SA ONO O LE PASEKA:

Galuega 15: 1 – 2, 22 – 29. Matua: Ua lelei i le Agaga Pa'ia ma i matou nei, ia lē fa'ae'e atu se tasi avega iā te outou, na o nei mea tatau.

Salamo: 67: 1 – 2 (tali), 4 (tali), 5, 7 (tali). Tali: Le Atua e, ia vi'ia oe e le nu'u.

Faitauga lona lua: Fa'aaliga 21: 10 – 14, 22 – 23. Matua: Ua ia fa'aali iā te a'u le 'a'ai pa'ia, olo'o alu ifo i le lagi mai le Atua...Aleluia.

Evagelia: Ioane 14: 23 – 29. Matua: O le Agaga Pa'ia na te a'oa'o iā te outou i mea uma lava; e fa'amanatu mai fo'i iā te outou i mea uma na 'ou fai atu ai iā te outou.

Tofitofiga o le Upu:

A tatou faitaua le Feagaiga Tuai, ua tatou faitau i 'ituiga e sefululua' a Isaraelu, ma a tatou faitaua le Feagaiga Fou ua tatou faitau i 'aposetolo e to'asefululua', ae e aogā tele pe a maitauina o le lisi o vaega ta'ito'asefululua e 'ese'ese – e masani e to'asefulu ma lua ae o igoa e masani e 'ese'ese. E le tatau ona tatou popole tele, ona o le manatu o le 'Sefululua' ua na o se upu e momoli mai ai le atoaga. Ua tatou maua ni vaega uma ia e lua i ni faitauga matagofie mai le Fa'aaliga o le asō. O le Ierusalem Fou ua sau i lalo mai le Atua ma le mamalu ua susulu mai le Atua. O se manatu ua sili, o se va'ai mamao ua fa'ataunu'uina, ma ua atoa i ai fa'ataunu'uga a le Feagaiga Tuai ma ana folafolaga ma fa'amoemoega, fa'apea le Fou; ona o igoa o ituiga a Isaraelu ma aposetolo o lo'o tusia i ma'a fa'avae ma faitoto'a o auala. O le Ierusalem fou la e le o se motusia ma taimi ua tuana'i, ae o le fa'ataunu'uina o le taimi ua tuana'i, ma e taūa tele lenā, ona e mafai ona fesoasoani e puipuia le Ekalesia ma le 'au fa'atuatua e ave ma ni tagata ua fe'alofa'i – ma fa'atauanau i ni faiga fa'aaauu fou. E masani ona finau le Ekalesia i le taliaina o tusituisga Eperu ma le fa'aauiina ma latou na mulimuli iā Iesu (fa'ata'ita'iga sui aposetolo). O mea o le a aumai e le Atua i le fa'ai'uga e le na o se mea e Fou, ae o se me fou ua maitauina – o le Ierusalem Fou; se mea o lo'o i ai ona a'a i le tala fa'apea le moni o le fa'aaui pe a o le olaga o le fa'atuatua o tagata a le Atua. Ma o le mea lenā o lo tatou fa'a'ailoa o se Ekalesia, mau a'a i le fa'atuatua a le 'au aposetolo, ma na fuafuaina mo le Ierusalem Fou.

Metitasio Aso Sa 26 Me 2019

"Ou te tu'uina atu ia te outou lo'u lava filemu"

E lē masani ai i le olaga fa'aleagaga ona va'ai i agaga o lo'o taumafai ma le fa'amaoni ia sao mai vituti pa'ū i le agasala - ona o mafua'aga o le naunauta'iga e faia ma le mautinoa se agasala veniale - i le tulimanu o le popolega ma le lē mauntonu, ua a'afia ai le afe o lē mauntonu ma masalosologa, ma i'u ai ina faigata le fa'amoemoe i lo tatou Alii. O nei mea uma ua tutupu ua fa'amatalaina ai le oti i le fa'amaoni

Ou te lē vaivai i le saga fai atu pea i agaga agalelei uma: Ia e fa'amalos i le mafai e tatau ai i lo tatou Alii. Mata'itū lau amio ma fa'aeteete ina ia aloese mai agasala veniale uma. Ae, mo le alofa o le Atua, ia faia e aunoa ma le aveesea o le ola mautinoa ma le filemu

Se'i o tatou faia se fa'ata'ita'iga.... O se agaga naunauta'i e i ai le fa'afaigata e faia ai se agasala veniale, e lē o se mea e masani ona tupu, manatu i lo tatou fanau mai ma le pa'ū gofie. I le taimi lava e pa'ū ai lea agaga, ona ia manatua ai lea o mea uma na ia faitauina ma mafaufau loloto ai e uiga i le agasala veniale, ma i lea lava taimi o le a lē fiafia, fa'atumulia i le fa'anoanoa ma mafatiaga. O le a fa'ateteleina le malō o le talitonu i le Atua. E sola ese le agaga mai ia te ia. Ua 'aloese mai le tatalo, po'o fai e leaga ai. O ana taumafaiga uma i le amioatua ua lē toe faia i le masani pei ona i ai. Ina ua mavae le tele o itula o le vevesi, ua toe maua le filemu o le mafaufau, ae ua na o le malosia o le tauivi malosi ma le tele o feutanaiga...

Aua tatou te faia nei amioga. Pe fa'apea foi, sei tatou mafaufau i se auala e mafai ai ona tatou fa'aleleia atoa ai mafatiaga e mafua mai i a tatou agasala ma le mautinoa i le Atua ma le filemu o le agaga.

O Sagata Theresa o Iesu le Tamameamea na fa'aalia manino lenei fa'aleleiga sa ia fa'apea ai: "Ou te iloa lelei lenei mea: e ui lava ina tatau ona tauave e lo'u agaga ia soligatulafono uma e mafai ona faia, o le a lē suia ai lo'u talitonuga; ae, o le a ou fa'ananati, ma lo'u loto ua nutilili'i i le fa'anoanoa, ma lafotuina a'u i a'ao o lo'u Fa'aola. Ou te iloa le tele o lona alofa i le atali'i fa'amaumau'oa; Na ou fa'amamafa le fetalaiga ia Maria Matalena, le fetalaiga i le fafine talitane, ma le fetalaiga i le tagata Samaria. Leai, ma e leai lava se tasi ou te fefe ai, auā ou te iloa lē ou te pipi'i i ai ona o mafua'aga o lona alofa ma lona agalofa mutimutivale. Ou te iloa i le tele o nei soligatulafono uma o le a mou ese atu pei o le emo o le mata; e pei o le matāua o se suāvai e pa'ū i totonu o se ogaumu a'asa. "Sei o tatou maitauina foi lenei mea: o se loto nutimomoia ona o le fa'anoanoa, ae lē fa'aitiitia ai le talitonuga ua te I latou, ua si'itia I le lagi.mautinoa - o nei mea e lua e o fa'atasi i se auala fa'apea, atonu e ui lava ina tauave e Sagata Theresa agasala uma a le lalolagi, semanū na te lafotuina o ia i a'ao o Iesu ma le mautinoa atoatoa.

Taulogologo

FAITAUGA MO LE ASO SA MUAMUA IUNI – 2019

Aso 2 Iuni Aso Sa – Afio a’e o Iesu i le Lagi:

Faitauga muamua: Galuega 1: 1 – 11. Matua: Se a le mea tou te tutū ai, ma va’ava’ai i le lagi? O Iesu ua aveaina a’e i le lagi.

Salamo: 47: 1- 2 (tali), 5 – 6 (tali), 7 – 8 (tali). Tali: O lo’o afio a’e le Atua ma le alaga fiafia, o lo’o afio a’e le Ali’i ma le leo o le pu.

Faitauga lona lua: Efeso 1: 17 – 23. Matua: Ua ia fa’anofo iā te ia i lona itū taumatau i mea o i le lagi.

Aleluia, Aleluia...Ia outou o atu e fai nu’u uma lava ma so’o; ‘ou te iā te outou i aso uma lava e o’o lava i le gata’aga o le laolalgi...Aleluia.

Evagelia: Luka 24: 46 – 53. Matua: Ua o’o ina o fa’amanuia o ia iā te i latou, ua si’itia i le lagi.

O LE FA’ASOLOGA O MISASA MO ME 2019

1st. Sunday	0.8.30am	Strathmore	Patele Tuli
5 Me 2019	11.30am	Titahi Bay	Patele Maleko
2nd. Sunday			
12 Me 2019	11.30am	Naenae	Patele Andrew
3rd. Sunday			
19 Me 2019	11.00am	Newtown	Patele Maleko
	11.30am	Wainuiomata	Leai se Misasa
	11.00	Porirua	Patele Tuli
4th. Sunday			
26 Me 2019	11.00am	Lower Hutt	Patele Tuli
	11.30am.	Stokes Valley	Patele Andrew

KALENA A LE KAPELANISIA MO ME 2019

ASO 3 ME 2019 - Fono Kapelania

ASO 6 ME 2019 – Fonotaga Autalavou

ASO 11 ME 2019 - Semina mo Tinā uma a le Kapelania @ 9.00am i le Falesa a Petone

ASO SA 12 ME 2019 - Aso o Tinā